

## 86 წლის შემდეგ პირველად, აია სოფიაში მუსლიმთა პარასკევის ღოცვა შესრულდება



86 წლის შემდეგ პირველად, აია სოფიაში მუსლიმთა პარასკევის ღოცვა შესრულდება. სტამბოლის გუბერნატორის, ალი იერლიკაიას განცხადებით, მუსლიმთა ღოცვა ადგილობრივი დროით დილის 10:00 საათზე დაიწყება და საყოველთაო აღფრთოვანების გამო, გახსნის ცერემონიაზე დასწრება უამრავ ადამიანს სურს.

თურქული მედიის ინფორმაციით, აია სოფიაში მუსლიმთა ღოცვას ქვეყნის პრეზიდენტი, რეჯეფ თაიფ ერდოღანიც დაესწრება. გადატვირთულობის თავიდან ასარიდებლად, მლოცველებს ხუთი სხვადასხვა ღია სივრცე დაეთმობათ. უსაფრთხოების უზრუნველსაყოფად, ღოცვამდე და ღოცვის დროს სტამბოლში რამდენიმე ქუჩა და მეტროს სადგური დაიკეტება.

აია სოფიას ქრისტიანული ტაძარი ბიზანტიის იმპერატორმა იუსტინიანემ 537 წელს ააშენა. 1453 წელს, ოსმალების მიერ ბიზანტიის დაპყრობის შემდეგ, ტაძარი მეჩეთად გადაკეთდა. 1934 წელს თურქეთის პრეზიდენტის, მუსტაფა ქემალ ათათურქის მმართველობის დროს, აია სოფიას მუზეუმის სტატუსი მიენიჭა.

მიმდინარე თვის დასაწყისში, თურქეთის სასამართლომ აია სოფიას მუზეუმის სტატუსი გააუქმა, რის შემდეგაც, თურქეთის პრეზიდენტმა თქვა, რომ აია სოფია ისევ მეჩეთად

გადაკეთდებოდა. 1985 წელს აია სოფია იუნესკო-ს მსოფლიო მემკვიდრეობის ნუსხას დაემატა.

[1tv.ge](http://1tv.ge)